

Sittart was waal es ei steedjen gebout; ronstrom logen wäl en muren, mer do en waas geine mert. Die van den Nüstad hauwen enne boter-, eijer- en vreuchtemert, mer do woren gein kouplü vöör te koup en de buschen (oude Akense munt) woren der neet om te betalen.

Dou verennigden sich de wisen van den Nüstad, en do sagt einen: „Comfraters, wir en höbben gei krüts (kruis), en dat höb wir toch nöödig, en wir höbben eine mert dé wir waal kössen missen; wat dünkt üch, dat wir mit Sittart hendelden, wir kössen hün de mert överloten vöör ein isere krüts.

Se woren allemool van meinin' dat het denk (ding) de moote weerd woor om draan te denken. Den audsten sagt: „Kom aan, loten wir ens drop slopen, mörgen sülwer ei besluut nümme.“

„Aangenommen“, sagte se allemool. Se sliepen drop, dreuimden dervan, komen 's taags derno beiein en dou schicken se einen no Sittart om te ronsdelen (ruilen). Het akkoort was achtrein (achter elkaar) gemaakt. Sittart gaaf het isere krüts, dotegen gaaf den Nüstad sinne mert.

Senjert (sindsdien) is Sittart ein stad en den Nüstad ein dürp, dat tou den naam van Futel kreeg, dé het so lang sal hauwen es ei stük van den Nüstad stoon sal. En wo sich ein Nüstadter läät seen, sal mir sich aaltiid in d' ooren sekken: „Do is eine Futelaer (ruiler) van den Nüstad“.<sup>2</sup>